

四庫全書

史部

欽定四庫全書

平定準噶爾方略前編卷五十一

乾隆十三年春正月癸卯

申飭署青州將軍三達色

上諭軍機大臣等曰前因安插青州之厄魯特博羅特等脫逃該將軍及副都統等不行奏報業已傳旨申飭及差侍衛賽音圖理藩院郎中善泰前往會同三達色將已經拿獲之博羅特等五人審訊

正法賽音圖等復命回京三達色並不將辦理之處奏聞又經降旨詢問而三達色於接到朕旨之後仍不過陳奏謝恩無一語及前事竟若置身事外者三達色著傳旨嚴行申飭

已酉

議定喀爾喀四部落運送軍營米石事宜

先是副都統保德奏言軍營米石交商運送糜費甚多不若令喀爾喀四部落每部落派駝五

百隻四部落共派駝二千隻每駝給製造鞍屨
等銀三兩派兵一名管駝五隻賞給銀三兩派
章京一員管駝五十隻賞給銀六兩每部落派
圖薩拉克齊二員每員各賞給銀十二兩由歸
化城運至軍營計駝二千隻每年運米四千石
其運費較之交商運辦僅需十分之一而於蒙
古人等亦為有益經軍機大臣等請

旨交額駙策凌詳細酌議到日再行定議尋額駙策

凌議奏喀爾喀四部落均情願出駝運米其酌
派官兵賞給銀兩事宜應如保德所請辦理再
查鄂爾昆塔米爾二城倉內現貯米五萬八千
餘石大麥二萬四千三百餘石小麥九十餘石
軍營每年支放官兵需米八千石大麥九百五
十餘石小麥九十餘石現在米石足敷六年之
用若每年再運米四千石加之本處所產大麥
小麥積久存貯恐致霉爛請於此一二年內驗

其米色改變者照數支給將好米加緊收貯仍
照從前原議足數二三年食用應請於庚午年
起令四部落照新定之例派駝運米至軍營米
石請嗣後祇支給內地官兵其喀爾喀蒙古仍
請給與羊價銀兩奏入得

旨軍機大臣等議奏尋議查從前喀爾喀兵丁原無
給米之例止給與羊價銀兩自乾隆六年始議
以每月給銀一兩五錢米一斛現據額駙策凌

以蒙古素不食米給與羊價實屬妥便為請但
軍營存貯米麥甚多現在綠旗兵丁又經裁汰
計每年支放無幾必致積久霉爛應將喀爾喀
兵丁仍照舊支放米石又查軍營搭放米麥每
年給米三百零六日大麥四十八日小麥六日
今大麥一項現存二萬四千三百石有奇若將
米麥酌量均搭現存數目足支內地官兵十年
喀爾喀兵丁八年食用今酌議給放喀爾喀兵

丁米麥至乙亥年停其給放全給羊價銀兩其內地官兵米麥亦俟給放至乙亥年令額駙策凌奏

聞以丙子年為始照依現在所議支給派出喀爾喀四部落官兵運送米石交與軍營存貯再查軍營羊價每隻給銀五錢後因價昂陸續自七錢增至一兩今大兵盡撤羊價平減應每隻仍給銀七錢每月總給銀二兩一錢奏入

上從之

甲寅

命議處原任青州將軍額爾圖等

軍機大臣等奏言臣等遵

旨詢問額爾圖據稱博羅特等六人脫逃理應即行
奏

聞後因博山縣擒獲五人惟達什哈一人未獲欲俟

審明具

奏因母病故移交署將軍三達色辦理似此緊要事件又係任內經手辦理並不奏

聞實屬罪無可辭請交部議處奏入得

旨自青州脫逃之厄魯特達什哈等六人俱係逆賊理應一面嚴緝一面奏聞乃額爾圖等竟視若尋常逃犯不行具奏甚屬疎忽及移交三達色後祇將錢糧咨請部示更屬舛謬額爾圖三達色著一併交部察議

二月癸亥

安西提督李繩武奏報進

貢夷使噶集等入境

丁丑

恩准夷使誤帶牲畜於哈密售賣

上諭軍機大臣等曰安西提督李繩武奏夷使噶集等到卡多帶牲畜欲在烏克圖行走責以違例據稱上年瑪木特回時並未傳諭此番初來實不知

定例所有帶來瘦乏牲畜懇在哈密變價次日仍
由東大坂過山省其情形尚屬恭順著照上次加
恩之例准其將所帶牲畜變價但須曉以與例不
符姑因瑪木特未經告知致爾等誤帶此次暫准
貨售乃係格外加恩明白宣示著傳諭李繩武一
面辦理一面奏聞

三月乙酉朔

飭禁夷人擅入卡倫

署定邊副將軍叅贊大臣塔爾瑪善奏言本年正月二十九日在格濟格臺站地方拿獲準噶爾扎卜等五人訊係入卡探親經侍衛達永阿曉諭發回並未申報管臺大臣除將該侍衛嚴飭外臣隨傳諭各卡嗣後有似此探親者著即解烏里雅蘇台叅贊大臣令將緣由報知將軍應如何辦理之處遵照辦理奏入得

旨準噶爾雖現在和好然從前並無准其人衆入卡

探親之議今次被獲之人從寬發回須令伊等知
係格外恩典嗣後務將部衆嚴加約束毋得視為
故常違議滋事俟夷使來時將此曉諭知之

丙戌

訓飭侍郎王保等

上諭軍機大臣等曰據王保奏稱準噶爾夷使知藏
內有出痘之人甚屬畏懼乞將護送官兵俱行離
遠居住又往大小寺內時令伊等自行守門不使

官兵同入等語準噶爾人素行狡詐其欲令我官兵遠離未必無言語離間之事由此觀之其詭譎伎倆尚未盡革自應以理曉諭使之折服且我兵既已出痘豈有復出之理玉保等不即以此言駁詰乃遽令護送官兵移令遠住辦理甚屬姑息著將此傳諭玉保等知之

辛卯

侍郎玉保奏報熬茶夷使瑪木特等自藏起程

還部

癸卯

命索拜等留心防範西藏事宜

上諭軍機大臣等曰據索拜等奏稱因前藏有出痘之人達賴喇嘛坐禪靜養郡王朱爾默特那木扎爾避往里定地方等語從前達賴喇嘛已經圓寂伊屬下噶卜倫等隱匿不報詭稱避人坐禪以致藏內滋事準噶爾乘間擾亂今藏內出痘達賴喇

嘛雖應暫避但恐伊屬下之人復蹈前轍或有事
故不以實告亦未可定此事大有關係不可不用
心覺察況準噶爾熬茶之事尚未完竣伊等見達
賴喇嘛避人靜養或不能無猜疑生事之處更當
嚴密防範著傳諭索拜傅清等令其留心體訪加
意防維即準噶爾人等已經回巢亦不可稍有怠
忽

命駐藏副都統傅清回京

上諭軍機大臣等曰近日準噶爾熬茶之事將畢傳
清著即馳驛來京其藏內事務交與索拜辦理如
索拜已經起程傳清仍留藏辦事俟另派員更換
夏四月戊午

停止夷使筵宴

軍機大臣等奏言從前夷使到京俱蒙

恩賜筵宴今據護送夷使員外郎甘布等報稱準噶

爾夷使噶集等於本月初六日進京現遇

孝賢皇后大事距百日之期尚遠應請將筵宴之處
停止至夷使唵集等仰覲

天顏之日一切禮儀照例辦理其齊集大臣侍衛等
著仍穿素服奏入

上從之

已未

準噶爾使臣唵集等到京進表請

安並貢方物

準噶爾台吉策妄多爾濟那木扎爾謹奏

大皇帝陛下歲奏請念經一事蒙

大皇帝隆恩俯准又諭我念經人等寧少毋多并令
於哈濟爾地方貿易以銀易貨懼忤無極從前
在土伯特處延請墨爾根喇嘛大半物故現存
者皆已年邁思歸故土准於何路行走酌量派
人送往以期推廣黃教安慰生靈伏祈

大皇帝睿鑒未盡之言令噶集等口奏恭進馬二匹

玉琬二隻貂皮四十一張奏入報

聞

庚申

命副都統拉布敦赴藏

上諭內閣曰駐藏副都統傅清已降旨令其來京其
員缺著副都統拉布敦前往更替即速整裝赴藏
不必帶領換班官兵俟下次派出換班大臣時再
照例帶領前往

壬戌

命議敘緝獲逃人之扎薩克頭等台吉達什丕勒等
軍機大臣等奏言額駙策凌奏喀爾喀頭等台
吉達什丕勒嚴飭伊屬將青州脫逃之厄魯特
達什哈留心擒獲甚屬可嘉應請將達什丕勒
紀錄二次其可否賞給戴翎之處出自

皇上天恩四等台吉孟克遵奉訪查於布拉罕地方
將達什哈拏獲亦屬可嘉應請照額駙策凌所

奏賞給粧緞一疋官用緞一疋布四疋外仍令
加賞一分兵丁齊巴克等四人亦請照所奏各
賞給布四疋外再加賞官用緞各一疋以示鼓
勵奏入得

旨達什丕勒著戴翎再著賞粧緞二疋官用緞二疋
餘依議又

諭內閣曰厄魯特達什哈自青州脫逃直至喀爾喀
游牧布拉罕地方其所經由內地甚遠沿途州縣

安設里甲原為稽察不肖匪類今以面生蒙古任其潛逃竟漫無覺察則山東直隸等處地方官員平日因循苟且雖有緝拏奸匪之責並不實力奉行可知達什哈侯拏解到京其由何路經行出口之處交軍機大臣審明後即行正法外其沿途地方官員俱著查明議處尋額駙策凌將達什哈解到軍機大臣等遵

旨審訊奏言臣等訊問達什哈脫逃情由據稱因不

能受青州炎熱欲逃往喀爾喀餬口亦並無一
人主使再脫逃時係由青州往西北邊牆關處
出口實不知經由內地地名等語查達什哈雖
因不耐炎熱起意脫逃但伊係準噶爾賊人前
從邊上被獲時即應正法因其投誠前來

皇上加恩安插青州乃伊不思感戴輒行逃回惟甚
可惡應請將達什哈交刑部即行正法再達什
哈雖供稱由青州往西北邊牆關處出口實不

知內地地名但青州西北係山東直隸山西之地達什哈乃面生蒙古地方官尚不能拏獲則平日怠惰不以緝匪為事可知應令該督撫查叅以為承緝不力者戒奏入得

旨達什哈著即處斬其逃走經由地方不行查拏官員均應議處但既未供明內地路徑若將三省官員通行議處未免株累其地方官查議之處著加恩寬免至直隸山東山西三省督撫按察使捕盜

同知通判等平素漫不留心著交部察議

癸亥

安西提督李繩武奏報貿易夷人賚木瑚里等
入境

甲子

傳

諭準噶爾使臣哈集

軍機大臣等奏言本年三月內據署定邊副將

軍叅贊大臣塔爾瑪善奏準噶爾烏梁海扎卜
等五人擅入額爾遜卡倫探親經卡倫侍衛等
曉諭回巢奉

旨令將此事於夷使來時明白諭知今夷使來京應
遵

旨曉諭令其歸告台吉務將此等烏梁海嚴加約束
不致日後滋生事端以成永久和好之道隨交
尚書臣海望等傳諭來使噶集據噶集等稟稱

欽定四庫全書

平定準噶爾方略前編
卷五十一

古

此等烏梁海所住之處離我台吉處甚遠不能
知悉乞將伊等名姓何人屬下擅入何處卡倫
之處明白開載交與我等歸告我台吉嚴加懲
治以靖邊界奏入報

聞

乙丑

準噶爾使臣喀集等入

覲

命賞策妄多爾濟那木扎爾粧緞蟒緞漳絨及玻璃磁器等如例

丙寅

賜準噶爾使臣噶集等緞布銀兩冠服有差

丁卯

議定準噶爾肅州貿易人數年分

軍機大臣等奏言定例準噶爾來京貿易之年不過二百人肅州貿易之年不過百人嗣因人

京途遠蒙

恩准其前赴肅州並准兩年中貿易一次人數仍以百人為率今來使噶集等又奏懇肅州貿易人數不敷乞

恩准加增一百名每年來肅貿易一次臣等酌議肅州貿易准加增百人照進京貿易人數其所請每年貿易一次之處應不准行奏入

上從之

辛未

賜準噶爾台吉策妄多爾濟那木扎爾勅書

奉

天承運

皇帝詔曰覽奏知爾感激朕恩言詞恭順朕甚嘉之
其欲將年老喇嘛請派人送歸土伯特從前並無
此議且喇嘛高年熟於經典何故轉欲送回彼出
家之人隨處安身又豈必定回原處即如來京喇

嘛亦從無送歸土伯特者此事不便准行再來使
懇請另發喇嘛扶助黃教佛之一道惟在誠心不
闕念經之人從前爾父屢次奏請朕已明白開導
未經准行爾當稔悉不必固請也再請肅州貿易
人數加增一百名每年貿易一次此事議有定例
不得更張姑允所請肅州貿易人數准作二百名
仍於兩年中前赴肅州貿易一次爾宜恪遵前規
克修和好以圖永受朕恩特降勅令來使齎回隨

勅賜各色緞十端加賞粧緞蟒緞各八端玻璃珮
瑯磁器十八事

丁丑

準噶爾使臣噶集等自京起程還部

五月丙戌

命蠲免那克舒番子己巳年應徵錢糧

上諭內閣曰據索拜奏稱護送夷使進藏熬茶之官
兵經過那克舒番子游牧將番子所備馬牛用過

五百有餘又派番子在喀喇烏蘇以北安置臺站
八處此係番子感激國家隆恩急公報効甚可嘉
予著加恩將該處已巳年應徵錢糧盡行寬免以
示體卹

申諭準噶爾人不得擅請入藏

上諭軍機大臣等曰準噶爾人狡詐難信從前拉藏
汗時進藏為亂至今衆喇嘛及唐古忒人懷疑懼
即其來至藏地供給一應所需雖俱施恩賞給價

值銀兩而唐古忒人等尚不無滋擾之處若聽其
時常往來日久必致滋事近據朱爾默特那木扎
爾告知索拜等以伊等時來藏內非土伯特有益
之事其言不為無見近時兩次准令進藏熬茶者
特因噶爾丹策零為伊父策妄阿喇布坦及策妄
多爾濟那木扎爾為伊父噶爾丹策零之故伊既
為父諄諄奏請不便過為拒絕是以加恩允准嗣
後準噶爾人其有非此等事奏請入藏者應令嚴

行拒絕斷不准行可將此旨傳諭索拜等令其轉諭朱爾默特那木扎爾並達賴喇嘛知之

恩賞郡王朱爾默特那木扎爾等綬疋有差

上諭軍機大臣等曰此次夷使進藏熬茶所有賞賚及供給各項雖係動公備辦而郡王朱爾默特那木扎爾感激朕恩凡事能體伊父報効誠心妥協辦理甚屬可嘉著加恩賞蟒綬二端大綬四端噶卜倫公班第達等襄助辦公並無貽悞亦著加恩

賞公班第達蟒緞一端大緞二端其噶卜倫扎薩
克頭等台吉策零旺扎爾及色玉特塞卜騰布隆
燦扎薩克頭等台吉旺對等俱著賞大緞各一端
官用緞各二端達達什達爾扎及章祿占巴阿
蘭巴奈巴克扎奈等俱著賞大緞各一端官用緞
各一端以示獎勵

癸巳

命停派叅贊大臣往開喀爾喀軍裝

定邊副將軍額駙策凌奏言貝勒旺扎爾數旗
本年有放贖之事其查閱軍裝請仍照上年所
奏交與副將軍及盟長等令其在各游牧處查
看叅贊大臣暫停派往奏入

上從之

命減派喀爾喀防秋兵

定邊副將軍額駙策凌奏言現在軍營無事所
有調派防秋之喀爾喀兵二千名儘足策應其

去歲奏請暫減之一千名嗣後無庸撥派倘遇
有調取之時一面奏

聞一面調取奏入

上從之

議定四部落備辦十八臺站每年需用牲畜

先是軍機大臣等奏言喀爾喀十八臺站每年

抵補馬匹及備用羊隻歷由官備牲畜內領給

今據額駙策凌酌令四部落照數捐備係由伊

等感激

聖恩情願輸將似應照依所請但臣等仰體

皇上體恤蒙古

聖心請交與軍營將軍大臣會同喀爾喀副將軍等
令其將所需牲畜或從內廠酌解交與牧放孳
生每年填補其如何辦理於喀爾喀人毫無擾
累之處妥議具奏到日另行定議尋額駙策凌
等奏稱據副將軍親王額林沁多爾濟等公同

呈懇轉奏喀爾喀地方安臺防守原為保護伊
等地方起見況蒙

聖恩賞給駐兵錢糧而所需牲畜為數無幾若復從
牧廠內撥用於心實有不安等語臣等看其懇
請出於至誠嗣後十八臺站需用馬匹羊隻應
由喀爾喀四部落照數捐備奏入

上從之

己亥

議定準噶爾投誠人等改發京口安插事宜

軍機大臣等奏言向例携眷來降之厄魯特發往寧古塔安插單身來降之厄魯特發往江寧杭州青州天津等處安插今據安西提督李繩武解到投誠之厄魯特尼瑪等眷屬十二口應照例遞送寧古塔安插外其與尼瑪同來之單身厄魯特策凌孟克特穆爾巴雅爾們都等四人若仍照例遞送江寧等處其地人已過多應

請將策凌等改發京口安插放為額外披甲給
與錢糧半分無庸另給娶妻銀兩並將立產銀
兩減半支給此係初次安插之人應交該將軍
用心收管並派賢能官員將伊等賞給銀兩置
立房地妥協料理嗣後單身來投之厄魯特即
照此次辦理發往京口安插奏入

上從之

癸卯

恩准夷人疲乏牛羊於哈密售賣

安西提督李繩武奏言此次貿易夷目賚木瑚里等所帶牲畜較之上屆加倍肅州牧廠既狹小難容現諭該夷於山北有水草處暫留收牧俟稍有臆力再分起趕行其疲乏牲畜約有萬餘窮夷懇求變賣勢難堅拒但哈密地處極邊自減防之後商民亦屬寥寥若仍令其趕赴肅州途中難保存活臣仍專差遊擊閔相師等設

法售變俾不致於周章奏入得

旨軍機大臣等議奏尋議準噶爾赴肅貿易定有章程所帶牛羊從無在哈密變賣之例但向來夷使貿易之年及請

安奏事之便多有攜帶牛羊至哈密求售提臣等據情具

奏屢奉

恩旨允准此次所帶牲畜既倍於上年其疲乏牛羊

應仰體

皇上懷柔遠人之意酌量於哈密地方設借售賣仍申明成例令其不得視為故常有違定議奏入上從之

丁未

議定分別安插投誠人等事宜

安西提督李繩武奏言此次投誠之阿濟巴勒第呢雅斯等二人查明係額敏和倬部落之人

昔年被擄今私自逃回雖有被獲復逃情節但遣之不去哀懇迫切情似可憫可否收留請

旨定奪奏入得

旨軍機大臣等議奏尋議收留準噶爾投誠人等屢奉

諭旨令該提等酌量情形分別辦理今阿濟巴勒第等既係額敏和卓所屬此次逃回雖經被獲復逃尚無追逐縱跡且哀懇情迫自應通融酌辦

金史卷一百一十一
阿濟巴勒第現有弟兄可認應如所奏交與該
扎薩克安插令其完聚其呢雅斯一名應照臣
等奏定新例解往京口安插嗣後仍令該提等
遵照原奉

諭旨不得概行收留如果情詞迫切萬難拒回再行
請

旨定奪務宜審度情形隨時酌量辦理奏入

上從之

六月壬申

命青海扎薩克公衮秦扎卜巡視卡倫

辦理青海事務副都統銜衆佛保奏言青海地方巡視額色勒金柴達木兩路卡倫奉

旨派出王策凌喇卜坦等十人輪班巡察今策凌喇卜坦病故據扎薩克輔國公衮秦扎卜前至西寧告稱我蒙

聖主隆恩自幼承襲公爵去年前赴木蘭瞻仰

天顏賞給孔雀翎令在

乾清門行走受

恩深重無出力報効之處今策凌喇卜坦病故其巡
視卡倫之缺懇求

奏明令我在巡察卡倫處行走以圖報効奏入
上從之

丙子

命加後藏尚卓特巴濟隆羅卜藏策旺達爾汗號封

巴勒桑策凌為頭等台吉

駐藏提督索拜奏言郡王朱爾默特那木扎爾
告稱後藏之尚卓特巴濟隆羅卜藏策旺事奉
班禪額爾得尼極為敬慎祈賜名號原任公那
木扎勒塞卜騰之子巴勒桑策凌祈賞爵秩以
示優獎此皆伊父頗羅鼐心內未了之事乞轉
奏施

恩奏入得

旨尚卓特已濟隆羅卜藏策旺感激朕恩凡事辦理
妥協殊屬可嘉著加恩錫以達爾汗號已勒桑策
凌亦著加恩封為頭等台吉嗣後當益加奮勉永
受朕恩

秋閏七月乙亥

命加恩準噶爾脫回護軍官長保等

上諭軍機大臣等曰由準噶爾脫回之護軍官長保
著授為藍翎侍衛在粘杆處行走右衛前鋒伊凌

阿發回右衛或在前鋒或在領催上行走遇有驍
騎校缺出即行補授每人著加恩賞銀二十兩

八月辛卯

訓諭駐藏提督索拜等防範藏地事宜

上諭軍機大臣等曰據索拜奏稱阿哈雅克卡倫人
報稱碩翁土庫爾等處見有千餘人蹤跡準夷如
來必由此路是以與朱爾默特那木扎爾商酌遣
台吉旺對等前赴喀喇烏蘇等處整兵預備又將

喀喇烏蘇及達穆各處番子游牧辦理移駐等語
朕思準夷此數年來往返遣使交易甚屬恭順理
應無事伊等如此辦理不免恒怯但準夷素行狡
詐常有覬覦西藏之意再昨歲進藏熬茶訪得用
兵金川之信意以我國正值征勦金川藏地未必
防範前來騷動亦未可定事之真偽雖未明白不
可不為預備著傳諭索拜如果賊信確實駐藏兵
丁僅止五百朕已另為籌辦此時拉布敦約略將

到伊等惟護守達賴喇嘛班禪額爾德尼移至打
箭壚等處駐劄不必以身係滿洲帶兵進勦致達
賴喇嘛等稍有疎忽自取罪戾但移駐達賴喇嘛
等亦不得輕舉妄動務須體察情形相機辦理此
皆不過先事預籌之策若論索拜此奏不特情節
未明且有自相矛盾之處即如所稱有竈五十餘
處竈止五十餘則與千人蹤跡不符又因有霜霧
不識去向彼時即有霜霧豈有不能尋蹤而得之

理再伊等遽將附近番子移駐亦覺張皇失措此事如不確實令準夷聞之反生疑惑大有關係此時自當更得確信著索拜星速奏聞辦理

甲辰

傳

旨申飭駐藏提督索拜等

上諭軍機大臣等曰據索拜奏郡王朱爾默特那木扎爾告稱遣往查看蹤跡之宰桑等回報至碩翁

土庫爾地方分路尋查並無準夷來往止有往東
北行走蹤跡或係截路唐古忒賊人亦未可知等
語前經索拜具奏朕即以此事可疑伊等辦理造
次令其作速確查明晰今果屬虛無索拜辦理藏
務凡事宜斟酌情形詳慎妥協始能安輯地方今
偶聞一語並未確查遽行整兵防備並令番子移
駐游牧使準夷聞之反生疑惑冒昧張皇至此已
極索拜曾經駐藏因係熟悉彼處情形之人準夷

赴藏熬茶令其前往協同料理似此毫無主見舉動失措實非朕所意料著傳旨嚴行申飭現在藏地既無事端所備兵丁應即撤回移駐番子仍令回至原地加意撫綏安慰不得仍拘泥前奏搖惑衆心並著傳諭郡王朱爾默特那木扎爾朕念伊父頗羅鼐奮勉効力施恩令其襲爵辦事想伊屬下人以伊年幼甫襲王爵未經更事未必如伊父時盡心出力此時正宜用心收服舊日任事之人

協同助理始於地方有益即如此事雖因卡倫人等冒昧具報亦由伊所遣人員不能詳細妥協所致嗣後務宜效法伊父約束人衆安輯地方一切會同駐藏大臣等詳慎辦理

辛亥

議定軍臺巡輯匪竊事宜

軍機大臣等奏言前因各臺站有被竊牲畜之事屢經傳諭各扎薩克等加意嚴緝乃因循廢

弛並不約束所屬現據軍臺總管輝色報稱二十
三臺復有被竊馬匹匪賊及兵丁追趕轉恃
強奪去衣服并所騎馬匹不法已極應行令額
駙策凌飭交二十三臺附近扎薩克等嚴查務
將賊人拏獲治罪其此後作何巡查清除賊盜
及將該扎薩克等定以處分之處仍令詳議具
奏並令理藩院通行傳諭軍臺附近居住之扎
薩克等各將所屬嚴行約束毋得為匪生事奏

八

上從之

九月壬子朔

命駐防哈密總兵官三年更代

甘肅巡撫黃廷桂奏言駐防哈密總兵官王能
愛於本年四月內二年期滿例應更換因夷使
往來正資熟手料理是以未經請

旨更換今夷使陸續回巢王能愛例應回任應否照

原議於安西甘涼肅各標內揀選副將一員抑
或仍派總兵駐劄奏入得

旨軍機大臣等議奏尋議哈密為西陲要地實全陝
藩籬夷使往來所必經防範宜加嚴密必得大
員駐防方足以資彈壓查從前副將瑚寶駐防
之時已蒙

特恩加總兵銜嗣瑚寶丁憂奉

旨特派總兵官王能愛前往嗣後不必仍派副將應

請於才具幹練之總兵官內請

旨派往且二年更換為期太速現在貿易夷使尚未
回巢正資熟手料理應令該撫俟王能愛於明
歲三年期滿之後再行請

旨更換奏入

上從之

己未

命侍衛穆克登額薩布喀善為軍營叅贊大臣調塔

爾瑪善努三來京

上諭軍機大臣等曰現在金川用兵北路軍營無事
侍衛穆克登額薩布喀善著賞給副都統銜前往
軍營伊等雖未經事尚可學習著傳諭額駙策凌
留心教導塔爾瑪善努三不必俟穆克登額等到
彼即於接奉諭旨之日速行起程來京請訓後前
赴金川辦事

庚申

恩免失察容留逃人之扎薩克圖汗已勒達爾議處
上諭軍機大臣等曰據額駙策凌奏扎薩克圖汗已
勒達爾拏獲安插荊州之厄魯特逃人察罕岱解
交理藩院辦理其失察容留之已勒達爾應否交
部議處等語扎薩克圖汗已勒達爾該管旗分容
留厄魯特逃人居住年久未經查出實屬疎忽理
應交部議處但經額駙策凌嚴飭而已勒達爾即
能逐戶稽察將察罕岱拏獲尚屬可恕著加恩寬

免其容留察罕岱之蒙古多爾濟等亦著照策凌所奏令由本處懲治察罕岱俟解送來京該部定擬請旨

辛酉

傳

旨申飭軍臺總管羅善等並飭部定議廢員聽候更換坐臺事宜

上諭內閣曰據軍臺總管羅善等奏稱廢員坐臺年

滿奉旨更換其應派來臺更換之人若仍在原任
及本籍尚未到京者請即將年滿人員發回其臺
務交鄰臺署理無庸守候等語坐臺廢員俱係効
力贖罪之人既格外施恩換回伊等即少待數日
有何不可羅善等即欲令其不致久候亦當將更
換人員催促速到豈有不待更換輒行發回之理
所奏明係瞻徇甚屬不合著嚴行申飭再記名發
臺効力人員理應在京守候迺令其擅回原籍是

該部定議本屬未周著交部將伊等應如何留京不致有悞更換之處再行妥議具奏

丙寅

訓諭駐藏提督索拜等

上諭軍機大臣等曰據索拜等奏郡王朱爾默特那木扎爾呈稱準夷兩次由阿哈雅克來藏近又探得於阿哈雅克見有賊人踪跡雖並無確信不可不令兵丁防範願帶經過戰陣舊人前往喀喇烏

蘇地方訓練彼處兵丁防範一切已令其前往等語朕派大臣駐藏特為藏地距京遙遠一切事宜俾得就近妥協辦理唐古忒人遇有稟商事件亦應酌其可否確示遵行從前索拜以粹聞碩翁土庫爾蹤跡輕率辦理朕已屢經訓飭今果並無事端而伊此奏轉若有意掩飾前非況向日索拜尚以唐古忒人往往無事造端為言則此次傳言安知非其捏造乃竟不察虛實墮其術中乎索拜駐

藏辦事年久此等情節並不詳審糊塗乖謬已極
但已令朱爾默特那木扎爾前往無庸置議索拜
不必前往金川著即速來京副都統拉布敦初到
藏地此事與伊無涉嗣後益當用心辦理其有應
指示朱爾默特那木扎爾者悉心指示俾得遵循
務宜詳慎體察安輯地方為要

已卯

命叅贊大臣薩布喀善赴烏里雅蘇台軍營

上諭軍機大臣等曰現在額駙策凌派巴爾品至烏里雅蘇台更換塔爾瑪善來京烏里雅蘇台係管理兵馬防守事務最關緊要俟叅贊大臣薩布喀善到日即令其前赴該處軍營辦理著傳諭額駙策凌知之

冬十月壬午

安西提督永常奏報貿易夷人賚木瑚里等出境

丁亥

訓諭駐藏辦事副都統拉布敦


上諭軍機大臣等曰拉布敦奏稱朱爾默特那木扎爾寄知阿里克地方交易回子等告稱匪夷現在內亂伊即移咨嚴飭各卡謹密防守如有匪夷來到即送至藏等語藏地關係緊要駐藏大臣凡事最宜查取確實權其輕重相機辦理不可稍有滋事前者索拜因傳聞之語遂將唐古忒番子任意

移駐其怯懦周章已極拉布敦當以為戒再藏地
不可容留準夷一人伊等素與土伯特睚眦不睦
留駐在彼必生事端可傳諭拉布敦知悉現在準
夷內亂與內地並無干涉惟嚴飭卡倫人等加意
防守如有欲由彼進藏者可詳悉曉諭令其向兩
路軍營進口此地斷不容違例收留嚴行拒絕並
將此一併傳諭朱爾默特那木扎爾知之

十一月丙辰

準噶爾部人烏里克達遜來降

命賞給安插如例



平定準噶爾方略前編卷五十一

欽定四庫全書

史部

平定準噶爾方略前編卷五十二至
四

詳校官監察御史_臣孫家賢

通政使司副使_臣莫瞻菴覆勘

總校官進士_臣朱 銓

校對官中書_臣李斯咏

謄錄監生_臣李亭植

欽定四庫全書

平定準噶爾方略前編卷五十二

乾隆十四年夏四月庚申

準噶爾部人羅卜藏等來降

命賞給安插如例

秋七月壬子

議準夷貿易事宜

陝甘總督尹繼善奏言前督黃廷桂奏請將交

易之事照前官辦唯令商人領變以所得餘利
歸公查交易之事惟商人素所熟習凡置辦紬
緞變賣皮貨等物俱能籌畫無遺及講價交換
裒多益寡均須通盤計算方不至大有虧折若
在官承辦不特官與吏錙銖較量有關體制而
費本價值亦必不能如商人之斟酌減省且所
得羨餘歸公商人毫無所利亦非情理之平應
仍令商辦而官為統攝照看庶為妥協又夷人

三年之內交易兩次若以一商承辦資本難於轉輸請派兩商輪值以次接濟至熬茶等年額外交易之事仍交官辦而以貨交商領銷奏入上命軍機大臣議奏尋議應如所請

上從之已而尹繼善以明年貿易期近一時艱於募商奏請暫准官辦一次得

旨允行並

諭軍機大臣曰尹繼善覆奏準夷交易一摺著照所

請暫准動項官辦一次向來夷人於交易年分之外借端不時往來希圖獲利其無厭之求固當少為節制然以字小之恩宏懷遠之略使邊庭息警疆宇寧謐所全實多尹繼善固不可輕信屬員多糜帑項亦不必過求贏餘以益官帑而使夷人觖望有失輕重之宜也著傳諭尹繼善知之

冬十月丙戌

準噶爾部人鄂倫楚克等來降

命賞給安插如例

丙申

訓飭駐藏副都統紀三加提督傅清都統銜赴藏辦
事

上諭軍機大臣曰據紀三奏稱到藏以來留心訪察
朱爾默特那木扎爾看來情性乖張屬下俱懷怨
望且伊又有疑忌達賴喇嘛之心恐日久衆怨愈
深達賴喇嘛亦不能忍致生事端請將伊兄朱爾

默特策卜登移取來藏協同辦事以分其權並將
達賴喇嘛自藏移至泰寧安駐等語此奏甚屬舛
謬朕前降旨紀三特令其察看朱爾默特那木扎
爾見朕諭旨時是否真切感畏伊之行止能效法
伊父頗羅鼐否或應教導或應防範俱著留心體
察並非即有辦理之意紀三但當將此等情迹據
實奏聞至日後生事與否本難逆料況又欲將達
賴喇嘛移至泰寧安駐此事尤不可行看來紀三

見識甚謬伊係駐藏大臣凡事宜果斷其於朱爾默特那木扎爾應教導者即為教導應防範者即為防範惟視事之輕重隨機辦理豈可顯露情形轉致起土伯特疑心乎將此寄飭紀三知之又

諭軍機大臣曰從前藏地常派大臣二員駐劄辦事後乃裁去一員朕思藏地關係甚要彼處應辦事件有二人相商較為有益且換班先後更替有一舊人尤覺妥當固原提督傅清從前曾經在藏彼

處事體諒屬稔知著賞給都統銜前往與紀三公同辦事其欽差大臣關防著傳清收掌不必來京可即由彼馳驛赴藏將此傳諭傳清知之

戊戌

命賞拿獲逃人之台吉旺布多爾濟等

額駙策凌奏言台吉額林沁旗下有厄魯特巴黨伊爾格特蒙古烏常巴圖等潛約同逃經烏勒木濟告知羅對羅對轉告額林沁之子旺布

多爾濟旺布多爾濟隨即領兵追至貢贊伯勒
齊爾地方全行拿獲查旺布多爾濟此事雖屬
奮勉但巴黨等本係交與伊父額林沁安插之
人因不能撫綏始致逃走應將旺布多爾濟擒
獲之功抵罪其隨旺布多爾濟追獲逃人之台
吉宰桑巴都虎博第蘇等與送信之烏勒木濟
羅對等請照例賞給奏入得

旨策凌所奏將旺布多爾濟之功抵罪固是但旺布

多爾濟聞信即追將逃人盡獲尚屬勇往著加恩
賞給粧緞一匹大緞一疋烏勒木濟並不入逃人
之黨又即時送信甚屬可嘉著加一倍賞給餘依
議

十二月乙酉

西藏郡王朱爾默特那木扎爾與其兄公朱爾
默特策卜登構兵降

勅訓諭並

申諭駐藏副都統紀三

紀三奏言郡王朱爾默特那木扎爾告稱伊兄
朱爾默特策卜登聚兵征取伊駐防阿里地方
之果弼柰等并聞有發兵進藏之信該郡王因
調兵豫備達賴喇嘛亦告稱朱爾默特策卜登
曾將征取果弼柰之事寄字與達賴喇嘛及班
禪額爾得尼等語奏入

勅諭朱爾默特策卜登曰爾父子受朕恩深重爾所

素知爾今無故發兵征取果弼柰是出何意若果如此是爾既負朕恩又玷辱爾父矣朕聞爾兄弟稍有不睦但爾於兄弟之間素敦和好爾父王爵尚肯讓爾弟承襲今乃轉欲搆兵取罪乎如果兄弟間有不和之處宜親身赴藏以實情告知辦事大臣與達賴喇嘛令計不出此擅自發兵殊屬糊塗朕此旨一到爾即欽遵親赴藏地在辦事大臣達賴喇嘛前聲明其故俟伊等奏到朕自另簡大

臣將爾兄弟之事分割明白務令永遠和睦如爾有欲奏之言亦即具奏朕自有措置所有諭爾弟勅旨一併抄寄知之又

勅諭朱爾默特那木扎爾曰爾父頗羅鼐在時誠心為國故朕疊次加恩由台吉封至郡王深加信用又准其所請將王爵令爾襲封辦理藏地事務令爾兄弟間自生猜嫌爾兄發兵征取果弼柰等朕已降旨詰問其起兵之由爾可即派土伯特賢員

隨同紀三處派出之傳旨章京前往爾兄如即遵
朕諭來藏朕遣大臣將爾兄弟不睦情由分割明
白務令永遠和睦如爾兄有難以來藏之處亦即
令其將實情具呈入奏朕覽其呈詞另為裁斷若
抗旨不來藏地又不具呈詞是顯有異心爾即發
兵酌量辦理爾惟當感激朕恩用心保守地方斷
不可滋事若因兄弟稍有不和即藉端生事是將
爾父一生忠誠奮勉之處俱掩沒矣爾可度量事

理輕重而行所有諭爾兄勅旨一併抄寄知之又
諭紀三曰朕思頗羅鼐父子受朕恩深重朱爾默特
策卜登何以遽有構兵妄動之事或者朱爾默特
那木扎爾意欲傾陷伊兄設此譎計亦未可知惟
當察其實情秉公辦理不可忽略稍致偏袒被欺
朕今降旨詰問朱爾默特策卜登起兵情由爾可
即派章京齎此旨揀選內地兵丁隨從率同土伯
特人前往傳旨若朱爾默特策卜登有難以來藏

之處亦即令據實具呈爾速行代奏候朕覽後再
為裁斷此派去傳旨之章京務令將朱爾默特策
卜登如何舉動如何言語之處詳細察看爾一併
速行具奏

丁亥

諭都統傳清體察西藏事宜

上諭軍機大臣曰昨將紀三所奏藏地構兵等摺及
朕所降諭旨俱寄知傳清計此時傳清尚未赴藏

接到現在既有朱爾默特策卜登起兵攻取果弼
柰之信可速寄信傳清藏地關係甚要事之真偽
令雖不能即定然不可不為留意朱爾默特那木
扎爾年幼躁急性好生事外貌雖依紀三教導其
實紀三轉被欺蒙亦未可知使伊本無生事之心
伊兄實欲進兵來藏是特其兄弟間互相侵犯辦
理尚易若伊兄並無此事而伊造言誣構藉端生
事則伊即係不可存留之人速宜辦理然土伯特

人賦性狡詐此事之起或因朱爾默特那木扎爾
嚴刻屬下乘伊兄弟不和從中離間更未可定此
處傳清務須留心沿途細訪倘朱爾默特那木扎
爾不願派大臣駐藏藉端設計以陷紀三斷不可
忽略以致墮其術中如有見聞即行具奏朕自有
措置再紀三過於拘謹遇事每無定見是以特命
傳清前往協同辦事令藏內又添駐藏大臣一員
彼處之人不無猜疑傳清凡事當與紀三妥商務

期有裨勿因彼此意見不同自生猜疑致土伯特人疑惑諸事細心辦理勉之慎之

壬辰

準噶爾部人沙喇克等來降

命賞給安插如例

壬寅

命侍郎拉布敦往代紀三駐藏辦事

乾隆十五年春正月壬子

準噶爾使臣尼瑪等入貢

準噶爾台吉策妄多爾濟那木扎爾奏言前者
使臣噶集敦多卜等回述

大皇帝諭旨令我永守和好又蒙

恩准我處貿易人增加百名為二百名不勝感激伏
念

大皇帝施恩我父以興黃教安羣生為念永敦和好
是以准我處通貢貿易至今今惟有益矢恭敬

遵行不違以副

大皇帝施恩和好之至意至前蒙

大皇帝准我處遣人在唐古忒地方念經二次具荷
鴻慈深加矜憫但我處由唐古忒請來喇嘛今大半
亡故為此恭懇

聖恩准我處每次差二三十人往唐古忒地方二博
克達四大廟及黃教各廟請安伏乞

大皇帝睿鑒施行仍令使臣尼瑪等口奏奏入報

聞

甲寅

賜尼瑪等宴於豐澤園

戊午

賜準噶爾台吉策妄多爾濟那木扎爾勅書

奉

天承運

皇帝詔曰據台吉奏肅州貿易之人蒙恩加增百名

感戴陳謝殊屬敬順朕甚嘉之至奏稱所有唐古
忒喇嘛已多亡故懇每次差數十人往唐古忒二
博克達四大廟黃教各廟請安等語爾使臣尼瑪
等亦經口奏及此朕為天下主可行之事斷無不
允行不可行者雖懇求亦不許昨爾奏來肅貿易
人少不足照看朕即照所請准加百名從前爾父
噶爾丹策零奏請為爾祖策妄阿喇卜坦差人三
百名往西藏熬茶朕特加恩派大臣官兵照看并

賞沿途牲畜路費至藏完成此事續又據爾奏請
為爾父噶爾丹策零差人三百名熬茶朕亦准爾
照前辦理似此應行大事朕一一俯從若非此等
事則斷不准行從前降旨甚明今爾又奏請每年
差二三十人在唐古忒地方行走是以斷不可行
之事來奏也爾意以已准爾等往藏熬茶兩次未
必再准前往是以妄生冀倖殊不知果有前此大
事朕原未嘗禁止往藏今無故每年令二三十人

前往不惟事有不可即照爾所請日後又必言人少請多增人數矣將每年必派官兵照看爾往來之人可乎況從前往藏熬茶時藏內郡王朱爾默特那木扎爾曾奏請停止準噶爾人往藏朕若准爾所請則朱爾默特那木扎爾所奏豈竟置之不問乎爾等即不用朕官兵照看以已力竊往藏地朱爾默特那木扎爾亦安肯容納乎但令爾地所有自藏延請喇嘛大半亡故誠恐黃教日泯朕方

欲廣演黃教豈肯令爾地之教日就漸滅今為爾
詳度朕中國大廟有名胡土克圖藏內挑取有德
行喇嘛及各處有學業喇嘛皆住持其中爾可將
喇嘛內聰穎者挑選十名或二十名送至京師在
大廟勤學三四年令其回去即可助行黃教但此
學經喇嘛須擇年少之人學成時可以行教三四
十年自後不得每年差來必俟人數將完方准再
行挑送學習此特恐爾處黃教漸廢是以多方為

爾籌畫非必欲令爾處喇嘛赴京也爾若不願送喇嘛來學即可中止如復以差人至藏為請則斷不許爾惟當感戴朕恩永圖承受勿妄生他念勉之尋又降

旨嗣後準噶爾貢使攜帶貨物如在尼瑪數目以內准其貿易倘逾此數即行駁回著諭尼瑪令其回時傳諭台吉知之

二月己丑

定邊左副將軍額駙超勇親王策凌卒

上諭軍機大臣曰前因叅贊大臣穆克登額等奏稱額駙策凌患病朕特令額駙之子策布登扎布與蘇巴什里帶領太醫馳驛前往朕意額駙偶然抱病當即痊可後穆克登額等又奏額駙病重朕即特遣乾清門侍衛得山前往看視續又遣貝勒羅卜藏前去不意伊等未到而穆克登額等奏額駙已於二月初五日病故額駙自

皇祖時至今始終竭誠宣力忠勤匪懈功在國家今聞
溘逝朕心不勝憫悼世子成袞扎布又奏稱伊父
遺言身故之後乞附葬公主園寢即此一節身後
尚不忘戀闕其一生實心為國可知著照所請即
令得山與成袞扎布一同護送進口並賞銀一萬
兩辦理喪事俟到京之日朕親往奠酒所有應行
卹典與在京親王一體加恩其左副將軍印務暫
令貝勒羅卜藏署理又

諭內閣曰額駙策凌有名台吉又係近親在

皇祖時即宣力邊陲懋著勲績

皇考益加寵倚封為親王專任以邊事身先血戰勦滅
猾賊大功昭著彌矢忠勤朕念王為

兩朝勲舊用益加優眷倚為屏藩今聞溘逝深為憫惻
所有齊集祭祀諸典禮已有旨照內地親王一體
加恩但古之勲戚多有從祀者如王之功允宜配
享

太廟雖本朝未有有親之蒙古王配享而朕念王勲著
國家名顯史冊委任既久殊寵宜膺著加恩配享
廟庭並賜祀賢良祠以示朕酬庸展親之至意

三月丙寅

命達爾扎策凌為頭等台吉

先是紀三奏報朱爾默特策卜登於上年十二
月十八日病故朱爾默特那木扎爾懇請收葬
其屍并養育其子

上特降旨允行並准朱爾默特那木扎爾親赴薩海等處安輯被兵驚擾之人至是紀三又奏稱朱爾默特那木扎爾請將伊子達爾扎策凌駐劄阿里地方奏入得

旨朱爾默特那木扎爾為防守地方欲遣伊子達爾扎策凌前往阿里駐劄所請甚是但達爾扎策凌現無職銜恐不足以統轄兵衆著加恩將達爾扎策凌授為扎薩克頭等台吉

已巳

喀爾喀副將軍公巴蘇卒

賞卹如例

夏四月戊寅

命副統班第往代拉布敦駐藏辦事

先是

上命拉布敦赴藏更換紀三至是以朱爾默特策卜
登已故藏內無事而拉布敦自藏甫回復經派

往是以降

旨令辦理青海事務副都統班第往換拉布敦回京
其青海事務即令紀三前往辦理尋又

諭紀三進京請訓再往青海班第俟紀三到日再行
赴藏

壬午

副都統班第奏西寧所屬四十部番日照例會
盟

癸巳

諭安西提督永常等辦理夷使貿易事宜

永常奏言夷使尼瑪回至哈密懇求變賣乏弱
駝馬購買貨物總兵張世偉恐堅拒啟釁遂悉
准其請奏入

上諭軍機大臣曰此事尼瑪固屬卑鄙小見而張世
偉亦未免過於姑息似此因循怯懦將來或恐貽
笑外夷難令其彈壓邊境伊前在西寧辦理喂駝

一節尚屬盡心或於內地營務相宜已令其來京
陛見酌量另補其員缺令呂瀚補授此旨不必告
知張世偉俟呂瀚到鎮凡夷使分內應得些小利
益之處仍照常聽其交易以示懷柔若例外干求
當示之節制以杜無厭之望著傳諭永常可逐一
詳悉告知呂瀚令其審度輕重妥協辦理

五月丙午

諭駐藏都統傅清侍郎拉布敦察奏朱爾默特那木

扎爾回藏舉動情形

先是傳清未進藏時奏朱爾默特策卜登構兵之信恐未必確或係朱爾默特那木扎爾欲并據伊兄之地捏詞以起兵端臣至藏察看情形如機有可乘即將朱爾默特那木扎爾辦理旋奉

諭旨朱爾默特那木扎爾乖戾詭譎留之終必生事或乘伊與兄構兵令四川總督策楞等帶兵以助

戰為名相機擒賊或俟明年

萬壽遣章嘉胡土克圖赴藏熬茶派川督帶兵護送至
彼伺間殲除二者孰為利便傳清至藏後可察看
情形熟籌具奏至是傳清抵藏朱爾默特策卜登
已故朱爾默特那木扎爾以曾經奏准親往薩
海地方安輯人衆遂調取部落兵丁運帶砲位
前往傳清拉布敦奏

聞

上諭軍機大臣曰此或朱爾默特那木扎爾以伊兄
雖死其部衆未必皆服是以調兵自護抑或因弟
兄啟釁懼朕問罪妄意離其巢穴即可苟免亦未
可定然此皆其畏懼之心所致也第自去冬不知
紀三何以使之疑惑如此其後派傅清前往駐劄
又令拉布敦往換紀三因連遣大臣到彼益生疑
懼亦不能無但今春伊遣人入貢時朕疊加恩賞
又令與青海親王結親亦可以解其疑惑此時想

未接到諭旨如果接到當喜出望外可以不疑著
傳諭傳清拉布敦此時惟應靜以鎮之待其自起
自止在我原無治罪之心則伊亦不生猜疑之念
勿因急欲解其疑心轉生一番忙亂俟其回藏後
將如何舉動之處再行奏聞可也

六月丙子

命扎薩克親王成衮扎布為定邊左副將軍

上諭軍機大臣曰額駙策凌為國家竭誠宣力是以

皇考加恩封至親王授以定邊左副將軍重任額駙謀
勇之名準夷莫不懾伏訓兵飭備使喀爾喀寧靜
無事實為國家勲戚重臣不意患病溘逝其定邊
左副將軍之任甚屬緊要簡任務在得人伊長子
扎薩克和碩親王成袞扎布前在軍營著有勞績
其才具實堪勝任雖左副將軍非世襲之職而因
才器使有所不拘著將成袞扎布授為定邊左副
將軍成袞扎布其務矢忠勤效法伊父訓練兵衆

安靖地方以副朕任用之意

辛卯

議準夷貿易章程

陝甘總督尹繼善奏言令歲係準夷貿易之年
現據報夷目諾落素等已到哈密但準夷自交
易以來貨物日漸增多內地愈難銷售允宜示
以節制令歲夷貨業已遠來臣已諄諭肅州鎮
道俟夷人到肅責其違例不准全數交易如果

情詞恭順再行酌量辦理至嗣後章程必宜定
議應令商人倣照節次交易數目將牛馬羊隻
皮張等項一一與之議定並言明內地商人止
照此數備貨若違例多來不准全入交易併不
准全入交界奏入得

旨所見甚是軍機大臣議奏尋議應如所請
上從之

丁酉

命副都統保德為北路軍營叅贊大臣

秋七月壬子

準噶爾部人伊拉袞博羅勒岱等來降

命賞給安插如例

九月甲辰

準噶爾部人達鼐來降

命賞給安插如例

丙午

駐藏都統傅清侍郎拉布敦劾奏郡王朱爾默
特那木扎爾

傅清拉布敦奏言朱爾默特那木扎爾往後藏
時將噶卜倫第巴布隆贊等誣搆抄沒其家分
給親愛之人又將朱爾默特策卜登之子朱爾
默特旺扎爾遣逐在外凡頗羅鼐所用舊人殺
害抄沒黥革者甚多臣等遣人往後藏問候班
禪額爾得尼回稱訪聞朱爾默特策卜登病故

後其子彭蘇克旺布或云逃去或云尚在阿里
地方至朱爾默特旺扎爾係奉

旨交與朱爾默特那木扎爾養育之人今在扎什倫
布為喇嘛朱爾默特那木扎爾現在帶兵二千
餘名在前藏後三百餘里達木地方游牧奏入
得

旨此皆朱爾默特那木扎爾乖張悖戾但道路遼遠
可暫聽之如果關係者大再行籌畫

丁未

授侍郎拉布敦為左都御史

庚戌

準噶爾部人敦多克等來降

命賞給安插如例

辛酉

準噶爾宰桑薩喇爾率所屬來降報準噶爾台

吉策妄多爾濟那木扎爾為其下所弑

先是沙喇克來降時稱策妄多爾濟那木扎爾
昏暴不理政事日以殺狗為戲其姊烏蘭巴雅
爾代管諸務又為策妄多爾濟那木扎爾所疑
送往回地羈禁等語及敦多克等來降又稱策
妄多爾濟那木扎爾自知凶暴淫亂懼衆人謀
害可代伊立為台吉者惟喇嘛達爾扎一人欲
託言至沙喇擘勒行圍將喇嘛達爾扎謀害有
台吉賽音伯勒兄與為首宰桑厄爾錐音袞布

鄂勒吹鄂羅什瑚巴哈曼集那木扎多爾濟博
和爾岱商謀乘策妄多爾濟那木扎爾行圍即
將伊擒住另立喇嘛達爾扎為台吉經小策零
敦多卜之子達什達瓦密告其謀策妄多爾濟
那木扎爾聚兵將厄爾錐音拿獲袞布等聞知
隨即領兵將厄爾錐音奪回復將策妄多爾濟
那木扎爾擒住矐其兩目併達什達瓦俱送往
阿克蘇囚禁遂立喇嘛達爾扎為台吉等語至

是薩喇爾來降據辦理青海番夷事務副都統
班第具奏將薩喇爾送京經軍機大臣詢問據
稱策妄多爾濟那木扎爾疑忌其姊夫賽音伯
勒克賽音伯勒克遂與宰桑厄爾錐音等同謀
將策妄多爾濟那木扎爾殺害立其兄喇嘛達
爾扎因我台吉達什達瓦為策妄多爾濟那木
扎爾所信任亦遂擒拿又拘喚大策零敦多卜
之孫達瓦齊達瓦齊不肯前往喇嘛達爾扎以

其人衆地險亦未敢相迫至我台吉被拿後又
欲將我等戶口分賞各宰桑是以我等來降等
語軍機大臣具奏並請將薩喇爾等照例安插
賞給畜產等項編設佐領即令薩喇爾管理奏
入

命安插於察哈爾尋

授薩喇爾為散秩大臣

冬十一月甲寅

四川總督策楞奏報朱爾默特那木扎爾伏誅
都統傅清左都御史拉布敦為逆黨所害

命策楞暨提督岳鍾琪進藏綏輯侍郎那木扎爾赴
藏辦事

先是傅清等奏朱爾默特那木扎爾謀為不軌
逆跡漸形請相機擒戮

上密諭策楞岳鍾琪調兵預備進剿應援至是策楞
等奏言先據西藏糧務通判常明稟稱朱爾默

特那木扎爾謀為不軌告其屬下有我已設計
撤回漢兵四百餘名其餘若不知機早回必盡
行誅滅等語又拉里糧務州同董恭稟稱朱爾
默特那木扎爾行令沿途凡一切漢土兵民以
及文書俱不許往來出入等語茲據駐藏外委
王廷斌等稟稱朱爾默特那木扎爾潛謀不軌
駐藏傳拉二大人於十月十三日誘至通司岡
衙門接

旨遂將伊誅戮詎逆黨羅卜藏扎什等聞信當即率衆數千圍署施放鎗砲周圍放火達賴喇嘛隨遣衆僧救護不能得入拉大人被亂刀砍害傳大人身被槍傷立即自盡所有文武官員多係被難並糧務衙門被刦庫銀八萬五千餘兩十四日羅卜藏扎什帶兵潛逃十五日達賴喇嘛始令公班第達暫理藏王事務附近喇嘛番衆等俱已歸順逃難各兵民皆係達賴喇嘛現在

養活等語隨又據管領臺站遊擊殷瑞稟稱十月十八等日達賴喇嘛傳令各塘照舊應付官兵不得違抗并探知達賴喇嘛在藏內傳令各番不得傷害漢人等語又據通判常明稟稱十月二十三等日據公班第達稱逆賊已經擒獲過半其餘亦不難擒拿搶去餉銀現在查追已得二萬餘兩其四面緊要路口亦派人把守等語又據臺站官遞到達賴喇嘛公班第達奏摺

二函臣等看此情形朱爾默特那木扎爾伏誅
已屬確實其逆黨亦據達賴喇嘛公班第達次
第查拘但羅卜藏扎什等敢率衆傷害大臣不
法已極應即進兵擒戮且恐餘孽未盡日後又
將滋事臣等酌議帶兵星即赴打箭爐相機分
別進剿應援現差幹員沿途曉諭番民并將進
兵擒拿逆犯緣由寄知達賴喇嘛公班第達以
安藏內之心再副都統班第現由青海赴藏聞

祇帶兵役二十名達賴喇嘛等或未知赴藏緣
由臣等一併寄知達賴喇嘛等令其遣人接護
奏入

上諭內閣曰駐藏都統傅清左都御史拉布敦前因
朱爾默特那木扎爾潛謀不軌情跡顯著奏請相
機剪除凶逆朕以伊等孤懸藏地未可輕舉並令
俟班第到彼察看情形降旨辦理乃傅清等未及
奉到諭旨以機有可乘遂爾便宜行事逆渠已經

授首而傳清拉布敦旋為逆黨所害為國捐軀深
用憫惜除另頒旨加恩優恤外其隨二人捐軀弁
兵著策楞岳鍾琪查明照陣亡例優恤目今藏地
雖已撫輯寧謐但善後事宜不可不專遣大臣前
往辦理著四川總督策楞提督岳鍾琪統領官兵
赴藏綏輯地方搜除逆黨總兵董芳隨後統兵策
應尹繼善著就近馳驛前往四川料理一應糧餉
軍機侍郎那木扎爾著賞銀一千兩整裝即馳驛

前往與班第一同駐藏該部遵諭速行

丙辰

命侍郎兆惠赴藏偕四川總督策楞等辦理善後事

宜

己未

命公班第達管理噶卜倫事務

先是班第達本朱爾默特那木扎爾妹夫為朱爾默特那木扎爾所惡抄沒家產分散妻子傳

清曾遣人密與謀誅逆酋通司岡之變傳清遣人傳班第達救護班第達以力不能救奔告達賴喇嘛及事稍定達賴喇嘛隨令班第達暫理藏王事務查捕逆黨綏輯人衆至是與達賴喇嘛各具摺入奏

上命班第達以公管理噶卜倫事務又

諭軍機大臣曰西藏經此番舉動正是措置轉關一大機會若辦理得當則可永遠寧謐稍有滲漏數

十年後又滋事端朱爾默特那木扎爾敢懷逆萌
由於地廣力强事權專一是以潛圖不軌自今藏
地應多立頭目以分殺其勢可傳諭策楞抵藏後
與班第等通盤籌畫務期辦理得宜為一勞永逸
之計至班第達不能救護駐藏大臣念其勢孤力
弱尚屬無過然亦無功可錄但不附逆黨猶知尊
向天朝應俟徐加恩賜策楞到藏可以此意告之
以安其心而用其力

十二月癸未

諭陝甘總督尹繼善辦理準夷貿易事宜

上諭軍機大臣曰據員外郎甘布報稱本年辦理準夷交易共銀一十八萬餘兩此次夷人貨物較上屆原多理應按額裁減念該夷遠來復再三懇請是以從寬交易但銀數至一十八萬有餘此內雖有兌給物件而銀數已屬過多以間歲一至計之其數益當不貲夫外夷所增之數即內地所減之

數且內地得貨而旋用旋敝外夷得銀則日積日
贏不可不為深慮著傳諭尹繼善令其查照軍機
大臣從前議准酌定章程劃清界限之處留心熟
籌隨宜節制以為防微杜漸之計亦不得因此而
過為裁抑輕議更張致駭夷人觀聽總期寓駕馭
之意於柔遠之中無濫無苛妥協辦理可也

戊子

副都統班第自青海至藏

壬辰

西藏逆黨羅卜藏扎什等伏誅

駐藏副都統班第奏言臣於十二月二十一日
至藏傳集現存之官員兵丁等查訊起事情形
備知十月十三日傳清拉布敦將朱爾默特那
木扎爾傳至寓中上樓相見時傳清拔刀剝殺
朱爾默特那木扎爾并殺其隨從四五人羅卜
藏扎什聞信即跳樓而下往喚同黨聚兵圍樓

施放鎗砲傳清遣人往傳班第達救護班第達
因力薄不能救護奔告達賴喇嘛達賴喇嘛隨
使人攔阻賊黨並不聽從放火燒房傳清身中
三傷立即自盡拉布敦中傷更多為賊所害主
事策塔爾系將黃元龍亦皆自盡筆帖式齊誠
自刎未死通判常明亦中矢石之傷陣亡千總
二員兵四十九名家人商民七十七人所有官
庫帑銀俱被搶奪羅卜藏扎什等乘間逃走次

日達賴喇嘛收聚餘兵安撫衆人公班第達擒
獲賊犯羅卜藏扎什等十三人牢固監禁臣嚴
加刑訊又供出夥賊德什奈等十四人查各逆
犯聚衆為亂殺害大臣刦奪帑銀兇悖已極應
即立正國法隨於二十五日將為首之羅卜藏
扎什與領衆放火搶奪帑銀之阿喇卜坦吹木
札特殺死多人之車臣哈什哈放鳥鎗弓箭打
傷大臣之達爾汗雅遜巴特馬古爾濟椿丕勒

妄介俱凌遲處死聽從賊首殺人運草放火先行上樓助惡之尚卓特巴拉扎卜曾本旺扎爾曼金得什鼐等俱斬決隨從作亂之通使扎什喇卜坦等俱絞決懼罪自盡之杯隴沙克巴監斃之拉克宸布俱行戮尸與各磔犯一併碎骨仍各梟首示衆餘黨分別發遣家產變價歸帑奏入報

聞

平定準噶爾方略卷五十二